

**■ COLUMNA**

# La Quotidiana: Sche nus vulain, datti ella vinavant. Vulain nus propi?

DA BERNARD CATHOMAS

**L**a Quotidiana porta di per di ils temas actuals a scrit sin maisa – ed ils plets necessaris per discuter quels. Ella dat ina vusch a la cuminanza, ella preschenta, sclerescha e valurisescha ils interess da quella. Ella gida a sa chapir sur ils cunfins regionals or, cree-scha identitad, è visibla en ustarias, parlaments, en il tren. Ella sensibilisescha e mobilisescha. Nagin dubi ch'ella correspunda ad in basegn fundamental dad ina gruppa linguistica. Ses problems actuals: ch'ella sto far sia lavur cun resursas persunalas e finanzialas me-mia modestas e ch'ella stu-ess avair dapli abunents.

**E**n la scena da medias dad oz domineschan duas noziuns il discours: «digital» e «convergenza». Chasas da medias convergentas sco Tamedia, Ringier e Somedia produceschan a moda digitala per radio, televisiun, online e print, vul dir gasetta stampada. Dapertut vegn postulà: cooperaziun, concentraziun da las forzas, nizzegiar sinergias.

**C**o statti tar nus? La Somedia, primarmain betg ina firma per promover linguas, vul laschar crudar La Quotidiana, sch'ella na retschaiva betg 300'000 francs per la redacziun.

**D**a la LR na san ins anc betg, sche e co ella



vul s'engaschar per salvar la quotidiana che resta ina da las meglras mesiras per ademplir sia missiun. Ella consultescha la gruppa romontscha dal cussegl grond.

**Q**uella ha «in mantun ideas pertutgant l'avengnir e la furma futura da la pressa», ma desista da far insatge concret.

**L**a ANR (Agentura da novitads rumantscha) di ch'ella n'haja betg da far gasettas. Dasper è ella vegnida fundada gist per pussibilitar ina quotidiana. Tge funcziun avess ella senza quella?

**R**TR (Radiotelevisun Svizra Rumantscha) na ha tenor la concessiun vertenta nagina basa legala per far ina gasetta. Ma la concessiun n'è betg scritta sin plattas da crap sco la lescha da Moses. Ella vegn decidida e sche necessari midada dal Cussegl federal. Èsi vairamain sclaus che quel concediss ad RTR sco exponenta d'ina minoritad

naziunala periclitada il dretg da rediger ina quotidiana, almain per il sector online, damai che quai na concurrenzass nagin? Tgi savess esser cunter in tal project? RTR è en ina situaziun unica, incumparegliabla cun las autras unitads da la SRG SSR.

**S**che la redacziun fiss garantida: pudess la Somedia sco fin uss stampar e spedir quella gasetta – 3 fin 5 giadas ad emna tenor 'ils mettel' avant maun – e pagar quella part cun las entradas ord inserats e cun las contribuziuns publicas per derasar gasettas?

**C**un cooperar e concentrar las forzas tanschessi la finala forsa schizunt per ina gasetta gratuita per tgi che vul quella, davent da Martina fin a Tschamutt, da Chiasso a Basilea e da Constanza a Geneva. Er quels da la diaspora dovran animaziun e programs. Probabel arrivassan quels meglie tar la glied cun ina gasetta che cun in collavatur supplementar che va a perder insanua en ina citad.

**S**che nus vulain vairamain ina quotidiana, vegnin nus cun forzas unidas e sustegn public da realisar quella. Per franc. Dentant mo, sche las organizaziuns responsablas prendan «las hottas enta maun» e persvadan ils politichers da star en persuerter a Cuira ed a Berna.